

四庫全書

子部

欽定四庫全書

子部
仁端錄卷十一

詳校官太醫院吏目臣周世泰

編修臣倉聖脈覆勘

總校官庶吉士臣何思鈞

校對官學正臣常循

謄錄監生臣趙廷璋

欽定四庫全書

仁端錄卷十一

明 徐謙 撰

陳葵 刪定

腹痛門

臟腑有熱毒而適外感風寒內傷生冷痘因而發以致陰陽相拒而為腹痛或作塊作脹與和平勻氣兼發散之藥又當察外症不得妄下傷氣使蘊其毒而不得宣

化也訣曰發熱腹中痛斑瘡腹內攻發多防不透發少
便防癰惡候也故心胸大痛者不治

痘疹腹痛者毒蘊於三陰也臍以上屬太陰脾經當臍
屬少陰腎經小腹為厥陰肝經須細別

初熱腹痛

內毒與外邪相搏欲出不出而腹痛飲食如常而腹痛
者用化毒湯

原熱腹痛熱二三日後便秘而痛者燥糞與毒相併也

用三黃丸七物升麻湯或桂枝大黃湯

詒妄狂亂而腹痛者用三一承氣湯

或食生冷而腹痛者用理中湯加桂心

食過多而痛者痛必亟疾啼叫甚痛在臍以上飽悶噫
氣而青白唇淡手足冷量輕重消之用升消平胃散一
服即止或原物湯及神曲山查砂仁枳實廣皮紫蘓
腹脹硬痛便閉者下之用備急丸

發熱自利腹痛者痛必緩有作有止痛在臍以下或連

腰痛面紅唇紫手足不冷用黃芩湯加木香青皮或化毒湯

泄瀉腹痛者用托裡建中湯

痘未出身熱煩躁腹痛莫忍而不休者亟用活血散服後不止必出紫黑有紅斑瘡乃極重之候或獨蟬湯立見紅活

如腹痛大便實者用桂枝大黃湯調獨蟬湯活血散嘔吐蛔蟲而痛用平胃散加烏梅

吐利腹痛乃太陽寒水乘脾土也用益黃散寒甚用附子木香痛止瘡亦發

若焦躁小便數唇焦發泡而腹痛用犀角地黃湯合化斑湯兼活血透肌散

腹痛痘不出而發厥者用芍藥甘草湯加蟬蛻煎服使毒氣泄而四肢溫而痛止

痘乍出乍隱腹痛者用七物升麻湯

初發熱及標痘時腹痛乃毒猶在內出不盡也用至寶

飲倍山查青皮木香少加柴胡煎服拔毒出外其痛自止

痘初出腹痛若暑月用黃芩黃連大黃牛蒡少磨木香汗寒月瘡黑者寒邪也用木香丁香

痘出三日尚未齊或見點紅赤過度腹痛難忍脾毒不能發越氣血凝滯或風之閉故也用獨蟬湯手中有痘始為出齊

痘出盡而猶腹痛者大發之用紫草飲總宜平胃散如

升發解利并利小便之藥則毒氣上下分消而痛自止
痘不出痛不止者不治

發熱標點心腹絞痛煩悶呌呼此痘陷伏燔灼臟腑也
或自小腹上冲心腹脹痛此入厥陰大痛也不治

或口臭舌胎發斑而腹痛甚此胃爛也不治

凡發熱時腹中攻攪覺痛上下不定或煩躁作渴詒妄
即當通大便秘其痛自定熱亦止而瘡隨發矣若下之稍
遲則變症蜂起身發紫泡而死切勿拘首尾汗下之戒

起脹腹痛

五六日皮堅起脾紅潤調勻而腹痛者只宜疎解但見兩臉痘起小便利則自安如兩臉不起速發之小便不利則利之

脹期多內傷也損其穀則愈不可妄下若見內傷之症又不可因循失下

傷生冷腹痛者用丁香脾積丸原物湯下

有瀉者用異攻散加丁香訶子

傷肥甘油膩糕餅熱物者用急備丸原物湯下

凡傷熱冷物得利後並用四君子湯加陳皮木香或錢氏異攻散調之

飲食過飽腹中稍覺不快者用木香大安丸

內傷飲食腹脹痛中氣鬱而痘不起發者用寬中快斑湯

養漿腹痛

灌漿至結靨時腹痛當察其痘色尚紅便秘之類乃毒

未盡也即與解之錯過日期十救三四用保元湯加內托

毒已盡又無陷伏久不大便而腹痛者必有燥屎也宜通之用當歸丸胆導法

便清腹痛者必食生冷或受寒也宜溫之用理中丸溫中化毒湯黃芪建中湯加木香

風寒所逼毒發不盡忽腹脹痛而煩躁喘促痘變灰黑必傷食也先以丁香脾積丸原物湯下去其宿食後以

人參白朮散去葛根加青皮廣皮與養脾丸相間服
若傷食輕痘仍寶滿色潤者用錢氏異攻散加青皮山
查漿未充而腹痛泄瀉用保元湯加白朮肉蓯陳皮木
香芍藥厚朴裡急後重者停滯為積也用陳皮厚朴甘
草山查神麴麥芽枳殼砂仁俟便利痛止再加補托
收靨腹痛

收靨時忽腹痛著中脘者熱毒凝滯淤血作痛也用消
毒散血湯回漿後脾虛飲食失節而痛者用芍藥甘草

湯加厚朴山查酒炒山梔

若虛而肺金鬱於大腸刮積而痛者用參桔湯

痘後腹痛

忽然腹痛手不可按者傷食也便秘急疎利之否則漸加喘急難治用雄黃解毒湯

痛在上腕者宜清導用脾積丸

便利者用木香大安丸

痛在中焦者喜手按之食少便潤虛寒也用黃芪建中

湯

痛在小腹不可近者燥屎也用備急丸胆導法

不因內傷煩躁不寧而痛者毒氣入裡也用解毒行氣
定痛之藥腸鳴自利腹痛虛寒也用黃芪建中湯芍藥
甘草湯加乾姜澤瀉

虛痛不止者用桂枝芍藥湯

痘後腹痛口噤僵直者用鉤藤湯

腹滿痛便秘者熱毒盛而氣不得伸也用芍藥甘草湯

去肉桂白朮加酒炒大黃

燥渴狂妄腹痛用三乙承氣湯

有燥屎者用三黃湯

熱毒在胃時欲嘔吐者用黃連湯

有瘀血者用桃仁承氣湯

治案

一痘未盡出腹痛噯腐吞酸大便酸臭乃飲食停滯也
用二服保和丸而愈

一痘起脹時不易行漿肢冷腹痛乃血熱痘而過用涼劑理中湯加肉桂木香炮薑一服而愈

一痘後傷食腹痛中氣不足宜補瀉兼施用香砂保和丸補中益氣湯調理而愈

一痘能食易化腹痛此胃熱易飢脾弱不能消磨鬱積而痛也用補中益氣湯加芍藥木香黃連而愈

益黃散

荊芥 乾薑 廣皮 甘草 茯苓 厚朴 人參

黃芪 丁香 官桂 腹皮 木通 澤瀉加棗肉煎

服

雄黃解毒湯

雄黃錢一 巴霜錢二 米飯和凡如黍米大

腹脹門

毒聚腸胃不能發出或毒少發於外而又入於內皆致
腹脹甚則氣粗發厥痘無血色或變紫黑多致不救當
升發利上下分消則脹自愈所謂痛隨利減毒以利消

也

未發毒盡不可驟補向不脹因峻補而脹者宜消之行
之

滿而疼痛者實熱在內也脾熱腹脹者不能食大便秘
用枳殼散未可驟用芒硝大黃

胃熱腹脹者小便赤秘用四聖散

乳食停滯作脹者升發解利藥中加消食之味又當審
所傷之食或寒或熱以治之

滿而不舒者脾胃弱不能運行也宜行氣健脾
伏熱在胃有所阻隔上則心氣不降而小便赤澀下則
陰氣不升而腹中脹滿宜發邪毒則胃熱自散用四聖
散

初起腹脹屬心火或有風寒交激聚毒於內不能發出
以致咳嗽氣急唇口開裂痘焦口臭此危症也當升提
解利使毒上下分消若表邪重者宜微汗之

毒欲出不出或風邪涼冷以致冷熱相搏陰陽不和脹

而喘急甚則厥逆者宜溫中利小便用木香散脉微發厥飲食不進下氣虛鳴二便自利痘無血色者亦宜溫之用益黃散去甘草加姜製厚朴或理中湯加訶子山藥

氣喘發厥致毒氣倒入內者用木香散異攻散若毒陷入裡必有他症相雜或煩躁大渴小便澀大便秘啼哭不止但用溫平解毒快氣紫草飲

目開神昏口氣大臭則神氣已離難治

痘已出齊毒已發透而腹脹者痘隱隱不明腹中陣痛
喘嘔滿悶者難治

痘五六日形色少神腹脹喘急腸鳴腹冷非內傷症與
陷伏也內傷者按之必痛陷伏者必煩悶今便利安寧
而虛鳴此陰陽不和中氣不足而傷冷也宜溫之用理
中湯加肉桂橘紅木香補中益氣湯調理

治案

一痘漿足不易靨腹脹發熱面赤午後益甚按之腹不

痛乃脾虛血少也用歸芍六君子湯加陳皮生薑大棗
數貼而愈

腰痛門

痘疹雜症腰痛為最凶

痘毒伏於腎而兩腎係於腰氣血流通則平氣凝血滯
則痛腎寔則強壯腎虛則難屈伸故痘發於四臟而腎
無留邪者吉若毒不達諸陽經而傳太陰脾經者則為
腹痛傳少陰腎經者則為腰痛多於初標時見之

金匱要略卷第十一
凡成婚破陽後腰痛猶可治童真腰痛乃先天之水不足也不治者多

初熱腰痛

痘毒起於右腎下循足太陽膀胱散於諸經乃邪之自裡達外也順也若初熱腰即痛者此毒邪由膀胱直入於腎而不達表故關節不利而腰痛經曰太陽所至為腰痛宜亟解毒以瀉少陰之邪發表以通太陽之經使邪氣不得深入痘雖密猶或可愈先服人參敗毒散次

服五苓散服後痛止者吉已後用藥宜多加枸杞子痛不止者凶若治之少緩則太陽之邪由表以傳於陽少陰之毒由裡以傳於陰表裡受病陰陽受傷榮衛之脉不行臟腑之氣皆絕或黑陷或痒塌而不救腰痛兼口臭脇下有斑者不治即胃爛發斑也胸高足冷者不治此腎敗毒深之症也

若兼上身痛者亦可汗之用羌活當歸或如神解毒湯初熱時腰痛不絕及見點青黑乾陷是毒在腎不得出

也錢氏雖製百祥丸欲令脾弱腎弱瀉膀胱之邪若下後身溫欲飲冷水陽氣復者為順若水穀不消寒戰者為逆下後宜溫脾用人參茯苓為君甘草厚朴為臣丹溪恐百祥丸太峻以宣風散代之更不若牡丹湯為穩他若敗毒湯加獨活細辛或加大黃或至寶飲加木香升麻提之

外治用生薑自頭至尻尾擦之汗出痛止又用熟麻油揉按痛處可以止痛

腎虛而痛者用保元湯加杜仲枸杞五味知母黃柏龜板

腰脇並痛此毒在肝腎惡候也然有因怒氣而痛難轉側者本經藥內加柴胡香附骨皮酒芍

有因挫閃而痛用活血藥乳香木香杜仲

有因風寒而痛用羌活防風白芷肉桂溫以散之

腰腹並痛上連頭者寒熱吐瀉咳嗽兼作用敗毒散加犀角汁煩渴詁妄小腹如火者毒甚而不清也用敗毒

金匱要略卷十一
散調益元散或辰砂導赤散

初時失表忽然腰痛腹痛膨脹努力乾霍亂者毒與胃氣相搏欲出而不得出也宜利之用千金一笑散或四順飲大柴胡湯承氣湯外則揉氣胆導或商陸根蔥汁敷臍

頭痛身熱腰腹背痛者汗之用蘇解散送下稀痘丹熱不退用蘓葉麻黃蔥頭姜汁煎湯下小無比散

兼煩悶者用敗毒和中散

凡腰痛者痘必乾枯非紅紫則必變黑火極似水也見點時急用清涼解毒庶可挽回

治案

一人十八歲初熱腰痛點發額角紅綻光澤心經順痘非腎逆候亦宜滋腎用六味地黃丸加枸杞杜仲與升發之藥間服痛止痘出至八朝煩渴詒妄唇燥舌黑卧睡不寧此仍腎水不足以制火也用保元湯加當歸芍藥枸杞棗仁桂圓間服八味地黃丸加人參麥冬枸杞

而愈有一症同補陽而不滋陰竟枯涸疤不脫而死

一兒初熱腰痛如折此折腰痘也強以荊芥防風敗毒散飲之發出點如蚤斑口臭出血而死

一初熱腰痛連背脊不能轉側點見左耳側及腰左一點如箸頭大平而紫又舌中心聳而黑此腎毒逆候也強以四牙散發出紫黑點五日而死

一兒孟夏發熱腰痛見點稠密紫黑幸有神而胃氣強元氣實症雖逆而尚有生理四朝以四牙散一服又化

毒湯送地黃丸二服次日痘起以黃連解毒湯加紫草
防風當歸芍藥地黃而愈

一女年十四痘正漿足忽腰痛不能轉側此經血去多
之故用六味地黃丸加當歸芍藥續斷杜仲而愈

一兒年二十痘後腰痛左尺脉弱房勞所致也以八味
地黃丸補中益氣湯間服而愈

一人年十八痘後四十日外忽腰痛極而手撒撒目閉
無光汗出遺尿喉聲如鋸六脉浮大此恣慾房勞而陰

陽離決也以艾灸氣海穴四肢活動又以獨聖湯八味
地黄丸而愈

一兒年十四痘後腰脊痛不能俯仰午後潮熱骨髓乾
枯水不勝火腎氣熱也灸崑崙穴中脉穴各三壯又以
六味地黄丸加獨活及補中益氣湯而愈

一痘不起而腰痛繆仲淳用人參蘆水煎服一吐而痘
起痛止毒在下吐以升之吐有發散之義也

一好痘綻朗而色淡紅兩腿痛甚腿亦屬腎此陰虛而

毒乘之也用活命飲二帖痛稍止又用十全大補湯六味地黃丸間服而愈若不早治至四肢厥冷變紫黑而死與腰痛之症相似不可輕忽

一痘後足脛痛甚不紅腫氣血虛不能榮養筋骨也用當歸芍藥四君子湯加牛膝獨活苡仁肉桂數服而愈
牡丹湯

丹皮

錢三

紫草

生地

錢各二

麻黃

分八

木香

分三

咳嗽門

無痰有聲為咳肺氣傷而不清也無聲有痰為嗽脾氣動而痰侵也肺主皮毛主諸氣之分布其變動為噦咳痘疹全賴氣血或因熱毒壅遏而不得發散或因氣血虛弱而外感風寒或因痰塞肺竅不得流通皆肺氣不清之病故痘疹之嗽皆從肺治若嗽逆失聲最為大忌而於標痘之始即當清理咽喉大要在審別色形如圓綻紅活而嫩者必鼻塞聲重氣粗此外感風寒也痘碎小隱隱起發白而嫩者必聲輕氣短而神怯此肺傷熱

毒也治嗽必先治痰消痰必先理氣故南星半夏治痰之主也枳殼橘皮理氣之要也至於清肺金解熱毒治痘之先著也初熱便嗽毒火灼肺而氣逆也痘未出先升發為主用參蘓飲升麻湯

兼外感風寒頭痛悶亂者用惺惺散木香散

痘既出而咳更增咽喉不利淫淫如痒習習如哽者此喉中有瘡也用甘桔湯加牛蒡或甘桔防風湯

起脹灌膿而咳嗽痰壅者此毒在肺胃生痰也宜發散

解毒非南星半夏可治用三拗湯加桑皮杏仁瓜蒌前
胡桔梗麥冬石膏

痰多三拗湯加元明粉

痰厥用五味子湯

有汗用葛根黃芩湯

痘壯收壓身熱渴嗽用人參清膈散

收壓後形寒飲冷風寒外襲而嗽者並用人參清膈散

五味異攻散

風寒重者用麻黃湯參蘓飲加瓜蒌杏仁桔梗有痰加枳殼半夏石膏

身熱而嗽無他症者用生地黄散

痘初咳嗽痘後未愈者餘邪未盡也用甘桔湯合瀉白散加牛蒡兜鈴兼脇痛者餘邪在氣道阻其升降也用小柴胡湯加枳殼桔梗茯苓五味子

肺焦喘急者用清金寧肺湯

聲啞者用防風桔梗湯

誤服辛熱嗽出血者用甘桔湯加石膏牛蒡茅根

身熱便秘而嗽者肺熱也用黃芩瀉肺湯

大便溏小便清不熱不渴而嗽者肺虛也用人參清肺散大便調者用甘桔湯合人參白虎湯

久嗽不止胸高如龜背喘急膿血口臭湯飲一滴不能入喉者俱不治

誤服參芪而喘促用枳殼陳皮桔梗山梔

治案

一痘五朝勻澤紅朗頂陷痰嗽此傷風失表邪客肺經
但漿期難於補托用甘桔前胡茯苓桑皮杏仁橘皮瓜
萋而愈

一八朝順痘但頂平淡嗽治宜清補兼行因不信藥十
二朝聲啞喘脹倒靨而死由前失於清解故也

一痘收靨厚而乾黑身熱咳嗽風寒客肺也用麻黃湯
而愈

一痘收疤咳嗽咽痛用升麻連翹牛蒡陳皮射干元參

而愈

一痘後傷風咳嗽發熱用表藥反加汗喘用二陳湯加桑皮杏仁桔梗反加搗搗此脾胃虛也用補中益氣湯加五味子麥芽鉤藤而愈

一兒痰嗽諸藥不效用黑散子而愈

一痘後咳嗽連聲不續痰鳴欲絕嗽罷吐白沫而唇白飲食少不得卧此虛火攻肺下痰通劑也用小異攻散加藿香半夏生薑厚朴大棗又用人參清肺飲而愈此

救子益母之法

一痘後咳嗽吐膿腥臭胸中隱隱作痛右脉數滑乃餘毒在胸作內癰也用摘紅貝母茯苓連翹牛蒡知母瓜蒌防已并蒸百合而愈

一痘後風寒痰嗽和食俱吐用清金散而愈

一痘後咳嗽吐蛔此脾傳胃也用六君子湯而愈

一痘後久嗽不已腰背俱痛此腎咳也用六味地黃丸加人參五味子而愈

一十二朝咳嗽不已服發表化痰藥反吐膿血此脾肺
虛傷真氣成肺癰也用桔梗湯愈

參蘇飲

陳皮 茯苓 半夏 甘草 桔梗 紫蘓 人參

麻黃 前胡 葛根

甘桔湯

甘草 桔梗

三拗湯

麻黃

二錢
去節

杏仁

一錢
皮尖
去

甘草

五分
生用

五味湯

人參

麥冬

五味子

甘草

人參清膈散

知母

人參

柴胡

當歸

白芍

桑皮

白朮

紫苑

黃芪

甘草

桔梗

黃芩

石膏

滑石

地骨皮

生地黄散

生地

錢一

杏仁

陳皮

款冬花

各八分

甘草

四分

清肺飲

麥冬

桔梗

各三錢

知母

荊芥

花粉

各一分

石菖蒲

訶子

各二分

又方

知母

桔梗

牛蒡

兜鈴

杏仁

石膏

骨皮

甘草甚則加桑皮川貝母喘則加葶藶

款冬膏

杏仁 欬冬 瓜蒌 麥冬 各五錢 搗梨汁入前藥同煎

再入蜂蜜人乳收成每服數匙

稀涎散

山豆根 熊胆 薄荷 細茶共為末先用薄荷湯嗽

口吹入喉

防風桔梗湯

桔梗 防風 甘草 人參 腹皮 蘇子 杏仁

麥冬 訶子肺虛加五味子共為末薑汁調下

二白散

半夏 柿霜 枳殼

赤茯苓散

淡竹葉 淡豆豉 甘草 赤茯苓 大青 升麻

桔梗 山查

喘急門

心火上炎肺葉焦舉肺為火迫故氣急而不得舒也或因風寒傷肺或因痰涎并緊或因毒火上升或因傷食

悶脹或因肺氣自絕皆能發喘而痘家之喘獨屬火者
為多若內毒不出或出而復陷以致煩躁悶亂腹脹喘
急頭溫足冷身涼脉微大渴大瀉虛喘無痰者必死蓋
痘全賴氣以逐毒此邪氣不清大忌一二日初熱便喘
毒攻心也便調者用黃芩湯加五味子人參有汗者用
麻黃葛根湯便秘者用前胡枳殼湯身溫脉微瀉者勿
服不止用葶蘆丸加桑皮杏仁枇杷葉
三四日痘正盛而喘毒燔肝分口渴焦紫惡候也

五六日而喘毒逆脾家房囊空涸陰無以化陽也

七八日而喘元氣自脫痰涎升湧無陰以和其毒也又
當詳其所因

因傷食熱蒸脾胃而肺喘者利之食去喘自止

因風寒而喘者用麻黃湯

因泄瀉內虛腹脹而喘者用陳氏木香散

利止喘定者生增劇者死

熱毒內蘊而喘者用紫草枳殼湯

內外壅滯而喘者用人參清膈散

脾虛弱而致喘者用白朮散

虛寒而喘者用木香散

治案

一痘稀嫩少神起脹時泄瀉而喘此氣虛也用補中益氣湯加肉蓯

一痘漿足痰喘便實此肺熱補太過也用枳殼湯加連

翹牛蒡腹皮瓜蒌而愈

一痘收靨厚疤喘急腹脹因能食非倒靨也用保和湯而愈

一痘收痂喘急用荊芥防風桔梗枳殼杏仁麥冬貝母橘紅竹葉

一痘後喘嗽用白花地丁一服而愈

一痘後喘久不止用蜜炒麻黃半夏桑皮款冬錢各一白

肉巢五個煎服而愈此案一云有黃芩蘊子杏仁覺更安

一痘後喘急聲重容寒侵肺也用蜜炒麻黃桂枝杏仁

甘草葶藶

一痘後喘嘔不已用長流水揚百遍煎清上藥而愈

一痘後泄瀉喘急此脾肺虛也用人參五味子而愈

一痘後痰嗽喘嘔用阿膠粘米各一兩牛蒡各一錢兜鈴各三錢

杏仁三粒甘草五分丸服

一痘後痰喘不已火侵肺也用黃芩黃連枳殼杏仁甘

桔花粉柴胡而愈

一八朝充灌因暑月汗多解衣為風所抑忽咬牙喘瀉

一晝夜額上有倒靨意急用紫蘓防風山查枳殼青皮黃芪白朮葶藶貝母前胡殭蠶得微汗喘緩次用震蟄丹三分隨以大青丸小青丸小靈丹服三服而愈

前胡枳殼湯

前胡 枳殼 茯苓 大黃 甘草等分

麻黃葛根湯

葛根 黃芩各三錢 黃連 石膏 白芍各一錢 五味子七粒

甘草五分

麻黃湯

麻黃 杏仁 石膏 細茶 桑皮一方無石膏

煩躁門

痘宜安靜最忌煩躁煩者不寧火入於肺為熱猶輕躁者擾亂火入於腎為熱為重然皆心之火也凡小兒熱渴嗜冷睡卧不安好抱行走啼哭不止撮手足而暴怒投器物而大呼皆煩躁也有因毒重而初發不透或因感冒而表裡不清無非五臟之毒內外鬱蒸治之者須

察其表裡虛實隨症疎泄使其心火有所引導榮衛得以疏通則自然安靜矣苟不詳審一見啼哭不安誤認腹痛妄投藥石冷熱偏勝毒蘊於中而致躁亂也必審兼症乃知病源兼嘔吐不食者熱在胃兼胸膈脹滿者熱在上焦兼咳嗽多痰者熱在肺兼口中流血者熱在心兼腹脹絞痛者熱在脾兼牽掣抽急者熱在肝呻吟者痛也搔爬者痒也條散條止者生肌也起輕漸重者死兆也揚手擲足欲去衣被者熱甚於表也用羌活湯

神識昏迷反覆顛倒者熱甚於裡也用導赤散合牛黃清心丸龍腦膏吐利不食者正氣虛也用木香散

大便秘腹滿脹者內有燥糞也用三黃承氣湯

煩渴而出不快者或有暑也用保元湯加麥冬五味或麥冬湯辰砂五苓散

晝煩夜靜陽陷於陰陰陽交爭也用四物湯加山梔

乍隱乍現此有伏也

痘痒搔爬此欲陷也如兼吐利厥逆腹脹喘急詭妄狂

擾目閉者謂之悶亂神喪不治之症

初熱便不寧煩而不躁者內熱也用人參白虎湯加山梔

見點後猶煩者毒未盡出也用消毒飲合奪命丹

痘盡起發而猶煩者表裡有熱也用導赤散牛黃清心丸加山梔麥冬或抱龍丸加犀角汁或黑豆湯代茶可以解毒復陰氣

因脹而痛呻吟似煩

漿充發熱而煩乾漿熱也用導赤散

痘多膿足而煩心血虛也用四物湯去川芎加麥冬山梔或棗仁湯

痂後發熱煩渴此症似輕而易重煩久不愈心脾皆為熱毒所傷煩則必渴渴則必瀉瀉則必寒戰咬牙而痒塌之患立至

腎熱而煩躁者必增自利輕用木香散重用異攻散發熱時煩躁宜涼血解毒

大小便秘宜清利之

厥逆煩躁用茱萸湯

漿期膿清未足煩躁不眠用龍腦膏

膿成後腹脹氣喘痘變煩渴此必傷食也輕者消導之甚則用不二丸原物湯

痘後煩躁氣血虛弱餘熱內蘊宜大補氣血而自定

治案

一痘未齊赤色壯熱煩躁清解之益甚此反水其毒也

宜升解之用升麻葛根湯加桂枝牛蒡紫草而愈

一四朝順痘煩躁不食毒未盡也用升麻葛根湯補中益氣湯而愈

一順痘日夜啼哭不止此木勝火熾刑金也用瀉青散導赤散加黃連而愈

一痘少淡白不易肥而煩躁此毒壅也過用保元湯而反悶亂焦紫乃以枳殼湯先解參芪之滯又以犀角地黃湯加蟬脫牛蒡紫草清其壅滯之熱後以保元湯調

理而愈

一痘後身熱午前煩躁解毒清熱而愈

一痘後夜卧不寧此胃不和而衛氣不得入於陰也用

四物湯加遠志棗仁桂圓及歸脾湯而愈

羌活湯

羌活 防風 龍胆草 山梔 當歸 川芎 甘草

牛黃清心丸

黃連 鬱金 辰砂 牛黃臘雪為丸

龍腦膏

冰腦錢一猪心血丸如芡實大小兒半丸

三黃湯

黃連 黃芩 大黃蜜丸

消毒飲

牛蒡 連翹 甘草 升麻 紫草 山豆根

奪命丹

麻黃 升麻 紅花子 山豆根 牛蒡 連翹 紫

草 人中黃

棗仁湯

棗仁 甘草 生地 山梔 人參 麥冬 歸身

不食倍食脾瘕門

痘以脾胃為主脾胃素強則飲食消化津液自生氣血
充實易發易收所以能食者為輕不食者為虛法當溫
養中滿煩渴便秘傷食者為實未可認虛為實概用巴
豆大黃峻利之藥以致內陷胡氏云與其救瘡痘於黑

陷之後孰若保脾胃於未陷之前脾主血胃肌膚起脹
灌膿全賴穀氣也亦有虛人毒重送毒不透起發亦遲
必有延滯於中宮心氣不通胃口不開咽喉作痛不能
進食似乎不食者故遇虛症當大補而兼升發遇實症
當清解而兼升發不究其因槩用開胃健脾之藥無益
也若疹家不食必口中不和不思食耳豈真不欲食哉
論脾胃者皆云喜溫惡寒喜燥惡濕故局方治痘家脾
虛多用溫燥之藥而有效有不效何也蓋胃為腑陽也

主氣主受納脾為臟陰也主血主運化總之土也土兼五行無成性寒熱溫涼各隨其症而治之如濕潤則為滿瀉痘色滑潤用黃芩黃連知母黃柏丹皮生地石膏犀角等藥而後土得其平五臟皆稟中和之氣而痘可保也食可進也丹溪云熱以刮虛此為胃氣虛寒者設也非所以言養脾陰也若槩用燥熱之劑則胃陽愈壯脾陰愈虧矣况痘後脾家陰血悉化漿虛寒者固有虛熱者尤多乃偏於助火消陰則中州祥和之氣變為消

燥燥勁咽喉乾痛便秘躁擾而死譬之陰凝潦土固不能生物而太旱燥槁百昌須涼雨之澤此又補中之大法也

密痘言嫩舌硬不進食者脾虛也用人乳加姜汁

平時能食忽然食少當看痘色如起灌灰白泄瀉而不食者虛也用四君子湯七珍湯人參養胃湯

赤腫便秘而不食者毒盛血熱也用四物湯加解毒藥甚則薑炒黃連便秘者下之若色不紅活頂不綻哭即

能食者難於收功

有不能食而生者乃臟腑實大便調平時穀氣已可養
瘡收成後自消穀而思食也

有能食而死者乃熱邪殺穀多食易飢必口乾引飲不
久而變症作

痘初不食者毒冲胃口邪正相搏也宜清解而兼升發
起脹不食者胃口停痰也用導痰飲

毒未盡不食用紫草山查紅花子

色淡白虛弱而不食用保元湯加山查神麴扁豆

嘔吐不食用保元湯加藿香他若同症選方則平胃散
大安丸養脾丸抱龍丸

痘後倍食者胃中蘊熱而易消也必面赤喘滿便難口
渴口臭口疳甚則生癰毒用三黃湯利之

面色青黃唇口淡白乃素有脾疳之症故亦少食慎勿
因其痘色焦枯誤用寒涼太過以致喘渴須保扶脾胃
為主脾胃一傷變症立作用人參養胃湯保元湯

橘皮湯 治傷湯

陳皮 青皮 枳殼 木香 山查 甘草 砂仁

厚朴 桔梗 枳實

導痰飲

人參 茯苓 甘草 半夏 白朮 白芍 當歸

厚朴 陳皮 山查 冲薑汁服

身背痛痒門

痛為實痒為虛痛者骨節疼痛痒者皮膚發痒發熱時

骨節皮膚痛痒者此肌表六經之邪也用羌活湯
有皮膚腠理太密痘毒攻發不透亦能作痛只以勻氣
解肌發散透肌之劑即足矣不必他求

有氣血凝滯作痛者用羌活當歸湯或桃仁承氣湯

有感冒作痛者用升麻葛根湯加羌活山查蟬退

有乾滯而痛者用水楊湯浴之

收靨時痛甚治之不止者凶

故曰六日以前多用發散六日以後多用活血

金匱要略卷之十一
痘初起便搔痒不寧者此火毒留於肌膚之間應出不
出游散往來故作痒也與傷寒太陰症身痒汗出者同
論不可作陽明症肌肉虛痒論也用桂枝葛根湯加大
力或桂枝麻黃各半湯去肉桂杏仁加升麻葛根大力
若瀉心火肝邪用消風化毒湯

痘遍出而半身作痛乃熱毒壅滯也用活命飲加蟬退
漿足而痛不已者此痛為實也用白芷陳皮甘草大力
連翹山查

嗜卧不卧門

痘家始終以安寢為吉血氣強盛榮衛流行邪出於表而不存裡是以安寢神靜

神氣本弱為熱所蔽而精神不能舒暢未可專以虛治宜清熱助氣用保元湯加橘紅山梔黃芩門冬芍藥茯苓

初熱昏睡此其常候心受氣於脾故也

合面卧及起卧不時此內有熱也必多陷伏之患

僵卧如尸呼之不應飲食不知此有毒伏在內神氣皆脫非嗜卧乃死症也

起脹嗜卧聲啞其喉舌必有疳蝕須急審之

既齏好睡昏迷此心血熱也用桔梗前胡當歸生地門冬山梔花粉人參黃芪白朮遠志棗仁

收齏遲痂皮不脫而昏睡此邪退而正未復也乃脾倦也用調元清神湯或調元湯加麥冬合安神丸或一味棗仁湯

內有蘊熱煩悶躁擾而不得眠又胃中不和則卧不安
衛氣不得入於陰則夜不眠胃實者用瀉黃散胃虛者
用四君子湯加遠志棗仁桂圓或歸脾湯便秘者用承
氣湯

治案

一痘後煩熱喘脹溺赤便溏嗜卧此暑傷氣分用清暑
益氣湯而愈

一痘後便溏食少嗜卧此脾胃虛也用六君子湯加木

香棗仁而愈

調元清神湯

人參 黃芪 麥冬 歸身 白朮 陳皮 棗仁

甘草 黃柏 大棗

安神丸

牛黃_{分五}黃連


梔子_{一錢五分} 歸身_{二錢} 猪心血為丸 硃砂為

衣

導赤散 治心有熱邪昏睡自語醒時如醉錯語

人參 山梔 木通 生地 麥冬 甘草 茯苓

葛蒲 燈心



仁端錄卷十一

欽定四庫全書

子部
仁端錄卷十二

詳校官太醫院吏目臣周世泰

編修臣倉聖脈覆勘

總校官庶吉士臣何思鈞

校對官學正臣常循

謄錄監生臣趙廷璋

欽定四庫全書

仁端錄卷十二

明 徐謙 撰

陳葵 剛定

大小便閉及心沙紅門

痘家小便欲其清而長大便欲其潤而實則邪氣不伏
正氣不病經曰小便數大便必鞭雖一二日不更衣無
苦也若大小便俱不通則邪氣內實三焦俱絕必目閉

金匱要略卷十二
聲啞肌肉黧黑而死故便秘者不救

氣血流行則大便無滯苟因內熱鬱結或因汗多或利
小便太過以致津液枯涸不得滑潤亦有血熱血燥血
虛不能傳送於大腸而成秘結然宜分三部上焦熱結
則宜降氣清涼用枳殼枳實赤芍黃芩黃連牛蒡葶藶
中焦熱結則宜行氣活血用赤芍紅花黃芩黃連連翹
山查下焦熱結則宜通導用大黃當歸白芍甘草黃芩
黃連或行導法

或因過汗過利小便而大便秘結者此表裡泄液枯竭故大腸乾燥未可妄行攻逐只宜滋潤或蜜導等法大便秘而小便亦不利覺肛門有裡急後重之勢者此津液還入胃中大便秘將自行也略秘結者宜涼血以潤之用當歸芍藥紅花生地黃岑黃連麥冬枳實丹皮麻仁熱秘者煩渴五心熱腋下汗腹脹用承氣湯涼膈散大柴胡湯下之若痘乾黑陷煩燥用牛李膏或百祥丸虛秘者不食嘔青水面青腹不脹裡急用潤腸湯豬脂

湯或蜜導胆導法不可妄攻以致內陷

風秘者能食結塊屎如栗下之甚澁用潤腸湯猪脂湯
加羌活

氣秘者腹脹腸鳴腰脇疼痛用前方加枳殼

便秘而身熱者用大柴胡湯

便秘而身不熱者多服通幽散四順飲紫草飲

初發熱大便欲潤若二三日不行急利之恐腸胃不通
禁衛不行痘出轉密也起發後大便宜堅實如能食而

大便秘行者無害若四五日不行則熱盛反蒸而濕其
瘡難靨亦宜微利之一云此血氣成漿之後候因熱而
秘宜清毒活血便自通矣

六七日大便秘不通而煩悶作痛者毒盛也用消毒活血
湯去人參黃芪加牛膝紫草當歸煎成入生蜜服如仍
不行方可加熱大黃及胆導法

八九日漿期內大便秘忽秘常欲去而不能急用歸尾枳
殼芝蔴紫草生地黃芩煎服即通翁仲仁三仁膏尤妙

成膿之前三四日大便不行者用胆導法

痘後便秘由毒氣并入大腸血液乾枯而閉脹也用潤腸湯三黃丸四順飲三乙承氣湯

小便秘澀心熱移於小腸小腸熱於膀胱膀胱為津液之府氣化則能出故小便之行必得肺氣下降而輸化肺雖居上焦而實水之源痘瘡火毒既熾則肺金受尅而氣為壯火之所食肺失其下降之令則水源塞而傳化之精液竭是以小便塞數故痘期小便數者病進矣

亦有流毒入肺致生積痰而塞氣道者不必利小便但清金降氣用涼藥以洩解其毒則小便自利微熱者用導赤散四苓散熱甚者用八正散辰砂六一散有血者八正散加瞿麥生地丹皮

有因血氣弱不能傳化須補中分其清濁則小便自利用補中益氣湯

痘未出而小便秘澀者熱甚乘肺也急解利之防其發驚熱則生風也

痘已出而小便赤澁者下焦血熱故也用四物湯加知母黃栢牛膝甘草

痘後熱搐膀胱則小便赤澁用導赤散

毒入小腸則小便不通用五苓散導赤散

二便俱不通者熱愈甚也用八正散通關散

心失其血則血隨毒激心通小腸滲於膀胱而溺血也

或如黑豆汁蘊木水屋漏水名心沙紅若陽毬腫脹者

宜清心理脾腎頸腫脹者宜解毒祛火不痛者難治痛

者易治用生地車前散痛加滑石山梔便秘加川芎苳
仁吐衄血加炒黃連總要兼行氣為主如八正散地骨
汁鼠粘湯黃連解毒湯之類惟生地車前散之效最速

治案

一人十九歲標點便結至十二朝不行口乾煩躁左尺
脉浮大此陰腎不足而津液竭也用人參黃芪當歸生
地知母枸杞枳殼兔絲子而愈

一痘後食粽便結痛甚手足攣搐用大柴胡湯加神麴

而愈

一痘後身熱便秘此餘毒結大腸也用解毒湯利之而愈

一痘後身熱便燥此辛熱耗津液用潤燥湯而愈

一十五歲血熱毒重大小便便秘此燥屎結於糞門也故前後俱閉進湯藥則小便愈急而不出用胆導法而通一痘正出而小便便秘此氣為火食也用導赤散加疎解藥而愈

一痘後溺赤虛火炎燂肺金也用六味地黃丸加五味
麥冬而愈

一泄瀉溺赤此陰陽不分也用五苓散加車前木通而
愈

一兒陰陽分而小便少此脾肺虛也用補中益氣湯加
麥冬五味而愈

一痘後小便赤澀熱在膀胱也用導赤散加竹葉山梔
茯苓車前燈心而愈

一痘後小便不通有用五苓散而愈不利陰囊漸腫此陰虛而滲利之復損真陰也用六味地黄丸加肉桂車前又補中益氣湯調理而愈

一脫痂後小腹脹小便不通有謂毒餘小腸用分水解毒藥愈脹此脾虛下陷也痘後無實症土堅則水清用人參大棗生薑而愈

大柴胡湯

柴胡 黃芩 白芍 枳殼 大黃

四順飲

大黃 當歸 白芍 甘草

紫草飲

紫草 二兩 滾湯泡悶一時服

潤腸湯

甘草 歸尾 生地 麻仁 桃仁

效方

甘遂 甘草 銀硃 食鹽紙包煨紅研末蜜搗如棗

大入肛門即通

八正散

赤苓 貝母 木通 滑石 扁蓄 車前 山梔

甘草

効方

女人新梳頭髮燒存性每用三釐吹入馬口

生地車前散

犀角 木通 升麻 白芍 黃芪 紫草 地榆

生地 車前 甘草

寒熱門

火動則熱火鬱則寒寒極則熱熱極則寒此陽極生陰之理皆痘毒欲出不出故為寒熱耳

痘未出一日間發寒熱者氣血與毒相攻氣血旺而不受邪觸也為實

痘未出前宜大熱以逐其毒非熱何能達表却乃頭溫足冷防不能盡發必致內攻此熱不熱也

出後寒熱毒盛則為邪勝毒輕則為虛極痘既出後宜表裡和平長養氣血以托毒成漿却乃往來不寧則氣血煎熬不能拘收其毒一無出路甚有氣泄血失之患此不當熱而反熱也宜辨之實者用升麻湯和解湯虛者用保元湯加肉桂助氣血以逐其毒

結痂後而發熱則為餘毒或用毒藥太過以致元氣虛損而發寒熱者則為大逆

凡遇或寒或熱或寒熱交并者不可驟補反用大寒大

熱之劑雖應發散亦不可太過實症始終宜用升麻湯和解湯或柴胡湯加知母石膏若大便秘結用大柴胡湯下之虛症宜補真元若寒熱作於七八日之間恐有坐陷之患須多服內托散或保元湯加肉桂

獨熱

七日前後獨熱者為蒸痘氣血與毒俱盛故也十四日後而獨熱者亦為餘毒俱易治

獨寒

七日前後獨寒者為氣血損毒火內鬱故也難治用保元湯加川芎肉桂生薑或內助丹

厥逆

厥逆者四肢逆而不溫也厥者冷也又甚於逆四肢為諸陽之本常宜和暖指頭微寒者陽氣衰也陽氣起於十指之端足心冷者陰氣勝也陰脉襲於足下而趨於足心也皆為惡候蓋熱毒之氣鬱遏於內元氣不得行以致表上無陽而厥冷也四肢為脾胃之主今宜溫而

一痘四五日毒已出盡形色無神二便自利四肢厥逆
腹脹發噦裡氣虛弱也稍遲則胃氣絕矣急以理中湯
連進二服內氣一暖痘即紅活四肢溫暖又以補中益
氣湯加丁香治其噦而愈

一痂後自言手足冷及按之反熱夜卧不寧經曰外熱
而內冷脾弱也內熱外冷胃弱也夜卧不寧脾陰不足
也用歸脾湯而愈

譚妄鄭聲狂越門

心熱則多言胃熱則妄語毒邪入胃則耳目妄有見聞
失志故也陽脫者見鬼

日間詬語以陽治之易愈夜間詬語以陰治之益甚午
前詬語未後必瘥午前詬語午後難革三四日之詬語
熱除自止六七日之詬語毒攻益難瘥瘥將形而詬語驚
瘥也瘥既腐而詬語鬼瘥也

凡詬語而聲烈如雷連連吐涎眼眶流淚唇紅面赤并
好食易飢近人愛眠臉黃舌正痰不緊并者皆活兆也

凡訖語而身熱直視厥冷拈衣捏縫惡見日光燈火噓氣吹炷鼻青黑色嚙指舐舌天柱俯垂昏不知人言語無倫狀如怕鬼此皆心腎二經神志俱喪必死症也

初熱訖語

痘將形而訖語者或驚痘也

痘未出而發熱昏睡煩躁訖語心毒熱甚神明浮越也宜瀉火鎮神升發清熱用葛根湯導赤散加木通山查蟬脫兼服牛黃清心丸服後神氣爽者吉

胃有燥屎三五日未更衣下之用四順清涼飲三黃丸

養漿詁語

昏睡不醒喃喃妄言此痘密而心血外耗心舍空虛無以養神宜養血安神用寧神化毒湯安神丸加麥冬人參昏迷之甚者先用龍腦膏後用安神丸

鄭聲

醒而邪言為詁語似睡非睡喃喃自言只一二語而再四舉者為鄭聲鄭重其聲也此火盛痰迷心神虛也用

梔子湯宣風散加減

狂越

火動於中發越於外心神不守腎志不寧故手足擾亂
言語乖張狂而不自知也

初熱發狂是熱毒攻擊觀其表涼則疏發之引毒達外
自安若眼紅甚先以絹浥冷水透其五心熱氣

若腹脹眼合大渴舌乾唇燥身反不火熱者此毒熱伏
根於內也將變失血之症矣口唇之痘必密成疔或隱

有斑點於肌膚之間欲出不出亟用紫草透肌湯遲一日則難治矣

初熱時失於表散煩躁大渴詁語發狂如見鬼狀不寧者此外邪與裡毒相搏也急用葛根湯調大無比散六一散甚則大靈丹或導赤散加黃芩連翹犀角黃連木通牛黃丸抱龍丸辰砂益元散皆可選用使其小便清利痘亦漸出方可收功

若便調狂亂者是痘為熱閉不得出也宜發表用升麻

葛根湯加麻黃或五苓散加辰砂

若風寒閉塞致紅斑隱隱不起者用敗毒散煎下紫草膏

見點紅紫小便如血赤者用二寶散服後若不省人事
詰語不休者死

報點起脹時顛呆妄言哭笑此心血虛神不守舍而毒
乘之也用升麻葛根湯或犀角地黄湯

紅紫煩躁狂言便秘者下之用三黃丸承氣湯或四順

清涼飲

四日毒留而發狂者用犀角地黃湯加黃芩黃連蟬

退防風

七八九日毒未解而泄瀉毒反攻臟腑而見狂越用保

元湯加犀角或犀角地黃湯加減

膿成收靨時忽發狂詈一身痘盡迸破者用安神丸

若喜笑不休此又神之有餘也用人中黃牛黃冷水下

或用金汁下

治案

一痘起脹焦枯訥語此火亢極也用退火回生丹無比散而愈

一痘密漿期白色昏睡訥語此血虛也用保元湯加當歸生地麥冬茯神棗仁

一午後發熱面赤訥語此火從虛發也用保元湯加當歸芍藥川連

寧神化毒湯

人參 當歸 生地 麥冬 木通 山梔 赤茯苓

石菖蒲 加燈心

安神丸

黃連 歸身 麥冬 茯苓 甘草 硃砂 冰片 猪

心血 搗丸 黍米 大燈心 下一丸 一方無麥冬 茯苓 冰片

有遠志 棗仁 石菖蒲

二寶散

生玳瑁 生犀角 為末

犀角地黄湯

芍藥 生地 丹皮煎成冲入犀角汁

白垢散

屎坑垢年久者洗煨為末燈心湯下

驚搐風癇門

夫駭然而厥曰驚眼睛直視牙關緊閉唇口喎邪四肢震動曰搐驚發於心搐發於脾痘之始發雖無臟不動而心實主之心火熱甚肺金受剋不能制伏肝木熱則

生風風火相搏神氣不安故發為驚搐諸痛痒瘡皆屬心火諸風掉眩皆屬肝木

痘未出而發驚厥者是熱透心絡而然熱毒隨搐而散於四肢痘一出驚即止其痘必稀心氣足故也所以多吉常不藥而自愈痘屬陰驚屬陽陰被陽冲則壅遏之毒易散也故得頭額手足胸背間漸漸自汗出者此腠理疏通毒已發洩不須服藥又要看面色唇口紅活目黑多白少微弄舌漸漸加增痘點雖多順候也凡驚厥

即標者心經痘也紅潤細小易漿易靨即稠密亦不為害非閉痘也或悖而不標者皆屬小腸惟此經沉而不泛多致難標

如發驚搐久而不復止痘應出不出每見痘之前發搐八九次者痘多密而難成功也痘既出一二日而復發驚搐此熱毒太盛而心主不能發脫也勢多伏而難起急宜升解又有氣血素弱復感風寒熱毒反滯又不敢易為發散清利故多凶若舌不止面色青黃唇口燥

裂驚搐或作或止者亦有驚死者必中惡也訣曰未驚先痘出齊逆驚風火相搏作搐多凶

平居無病忽爾發驚目上視頭仰向後身反張者肝木生風此名痘候宜發散疎風平肝利小便為第一縱未即効亦不敗事候其熱氣得泄則心神自安用惺惺散加蟬退全蝎升麻紅綿散加味導赤散加硃砂兼羌活湯瀉青丸或云痘前發搐須以桂枝木香煮過用之

痘初二日發驚搐者毒伏於心宜升提解毒用羌活

升麻湯消毒飲合柴苓湯或導赤散

驚痘易治以毒由心經出也用導赤散加羌活升麻兼
瀉者用茯苓湯加甘草

發熱一二日發驚一二次痘出必稠治之而搐不止痘
多而難治也急服黃連紫草飲

點後戰慄驚不止者九日必死

痘未出而驚搐不可遽投涼心之藥如硃砂金屑珠粉
冰片麝香輕粉巴豆等藥使心寒而毒不能發以致伏陷

每見誤服寒藥臨危之際隱隱斑出已無及矣宜快氣利小便風熱退則痘隨出而驚搐自愈用升麻湯合消毒飲或蟾酥丸

若風火相搏面赤引飲痰鳴上視喜居冷處者用柴苓湯或抱龍丸小便利者可治不利者難治用導赤散兼牛黃丸或四物湯加硃砂茯神遠志防風木通前胡黃連

初熱目上視頭向後角弓反張而汗出如珠者死但四

肢強直不能舉動者用四君子湯加川芎當歸羌活天
麻蟬退木香兼悶亂弄舌是毒不得伸也用犀角地黃
湯清解散

因風寒所激發驚宜疎風清痰用八寶丹地龍丸鎮心
丸

初點日久不退力壯而角弓反張風痰壅塞藥石不通
者用瓜蒂散或牛蒡殭蠶皂角煎灌及探吐法三四日
後宜伐肝則青皮白芍保脾則陳皮山查解利則木香

黃連疎驚消痰則八寶丹痰盛詰語昏迷驚搐聲重鼻
塞流涕脉浮數者外感風寒內蘊心熱也用蘇解散人
參羌活散

驚搐不止者用紅綿散調辰砂六一散

氣血弱不能送毒外出而驚搐狂躁瘡淡淡在皮下面
白唇青脉遲緩者用溫中益氣湯但心煩啼哭者用麥
冬導赤散

大抵實則消痰降火虛則保脾而兼升發

痘色紅紫面赤唇裂毒盛而驚搐者用清解散

痘已現形驚風不定昏睡不省痰壅氣喘目閉詰妄下
後不減毒邪壅塞清道不行至惡候也所謂驚輕毒亦
輕驚重毒亦重

一則火毒攻心心熱生風風火相搏痰鳴直視面赤引
飲喜冷者用清神散火湯或導赤散瀉青丸抱龍丸或
升麻湯加防風茯苓去升麻

一則病後多食胃弱不勝穀食發搐必面黃潮熱大便

酸臭吐利腹痛先用備急丸紫霜丸或丁香脾積丸後
用木香大安丸異攻散只用抱龍丸

大便秘者用四物瀉青丸或小承氣湯

將醫病忽然發驚泄瀉者乃蘊毒復入於心十無一生
更兼寒戰咬牙腹急汗出如珠與先吐瀉而發搐一發
連綿不休者不治此與雜症慢驚同論脾土既弱風木
自勝宜溫補厚土猶不勝也況又驚氣入心土絕生化
之源者乎即輕者亦火而成癇貽終身之害用寧神湯

抱龍丸

風癇似驚

痘前熱則生風項強牽引直視口渴舌強如中風狀用
參蘇飲消風散有痰便秘加元明粉見點後勿服驅風
峻藥起脹後見之則危用參蘇飲消風散痘後見之手
足麻木無汗者用參附湯

手足難舉動常出汗者用芪附湯

治案

一兒驚搐卒仆甦而復作此風寒壅毒也以紅綿散治之而愈

一兒驚搐誤以驚藥涼其心痘不得出而死

一兒初熱發搐以升麻葛根湯加天麻勾藤蟬脫木通枳殼痘出而愈

一兒見點時驚搐此心血虛而客邪入之也用四物湯加茯神遠志石菖蒲棗仁蟬殼而愈

一初點驚搐不止此心脾虛而血少失治十六朝卒

一兒痘出二三日驚搐此毒不透心經有邪也用導赤散加蟬蛻黃連紅花天麻勾藤石菖蒲而愈

一痘出未盡驚搐且溏泄肢冷用異攻散數帖而愈

一漿期驚搐不止用安神養血丸而愈

一痘後驚搐吐瀉肢厥目直痰鳴此中氣不足也用補中益氣湯兼醒脾散附子理中湯下至聖保命丹而愈

一痘後驚搐氣喘痰喘口閉目直二便秘澀有似急驚

乃風邪有餘之症宜清解散瀉氣用天麻抱龍丸瀉青

金匱要略卷十二
丸而愈

一痘後過食白菓驚搐痰壅目直腹脹喘急此氣滯生痰也漸與甘草生薑湯得吐瀉而愈不可以風治也

加味導赤散

人參 黃芪 白茯苓 木通 生地 細辛 甘草

羌活湯

羌活 川芎 防風 山梔 胆草 當歸 甘草

薄荷 淡竹葉

消毒飲

荊芥 牛蒡 甘草

柴苓湯

柴胡 茯苓 猪苓 澤瀉 黃芩 半夏 甘草

人參 白朮

導赤散

木通 甘草 生地 防風 薄荷 赤芍 燈心加

山梔麥冬

蟾酥丸

人牙

一

硃砂

五

雄黃

牛黃

各三

蟾酥

一

加全

蝎

僵蠶

人乳為丸如黍米大每服七丸人參湯下

抱龍丸

胆星

天竺黃

硃砂

雄黃

麝香

甘草膏為丸

皂子大每服一丸燈心湯下

琥珀抱龍丸

粉草

人參

茯苓

天竺黃

白檀香

枳殼

枳

寶胆星 硃砂 山藥丸如皂子大薄荷湯下一丸
牛黃清心丸

黃連 黃芩 山梔 鬱金 硃砂 牛黃鴈雪調麩
糊為丸如黍米大每服七八丸燈心湯下

八寶丹

天竺黃 龍齒 胆星 硃砂 白附子 全蝎 珍
珠 琥珀 牛黃 麝香 冰片金箔為衣薄荷湯化
下一方加雄黃殭蠶蟬脫天麻

人參羌活散

人參 羌活 柴胡 前胡 防風 荊芥 黃芩

甘草 枳殼 山梔 桔梗 川芎 茯苓 紫草

牛蒡 天麻 骨皮 蟬退 一方無天麻有澤瀉

紅綿散

全蝎 天麻 麻黃 蟬退 薄荷 甘草 紫草

荊芥 葱白

溫中益氣湯

人參 黃芪 當歸 白朮 茯苓 甘草 川芎

白芷 木香 防風 官桂 山查

麥冬 導赤散

木通 麥冬 甘草 梔子 燈心

清解散

防風 荊芥 蟬退 桔梗 川芎 前胡 葛根

升麻 黃連 黃芩 紫草 木通 牛蒡 連翹

山查 甘草 生薑

紫霜丸

杏仁

五十粒

巴豆

二十五粒去油

赤石脂

代赭石

醋炙各一兩

蒸餅

為丸如黍米大每服三丸或十九乳汁下

四順飲

大黃 當歸 白芍 甘草

寧神湯

人參 當歸 生地 麥冬 山梔 甘草 黃連

石菖蒲 硃砂

參蘇飲

陳皮 茯苓 甘草 半夏 桔梗 紫蘇 乾葛

前胡 人參

消風飲

羌活 獨活 殭蠶 藿香 枳殼 防風 天麻

地骨皮 蟬退 前胡 柴胡 黃芩 花粉 桔梗

茯苓 荊芥 紫草 甘草 牛蒡 人參

參附湯

人參 附子 羌活 麻黃 防風

芪附湯

黃芪 附子 當歸 全蝎 防風

諸汗門

汗乃心液痘屬心火熱氣內蒸腠理間泄故液隨氣而
也無因而出者自汗也寐中出醒即止者盜汗也出來
浹浹者熱汗也流珠者力汗也冰冷者虛汗也頭汗至
頸不過胸者六陽虛也上至於頸下至於臍者胃虛自

汗也

手足汗多人參白虎湯加黃連石膏知母人參甘草
占米

身冷惡寒而反汗用異攻散救之

出汗惡寒汗出昏沉流汗煩渴汗綴如珠汗出如油髮
潤如洗兼喘不休是為六死症

凡自汗盜汗皆能虛人丹溪謂其無妨者蓋指形色順
者而言也若汗多而形色日變者死故治痘不可專以

汗為虛也須辨古用藥

凡痘未漿多汗恐不能灌既灌多汗恐不能靨既靨多汗恐血脫陽虛變生他症最宜細心審治

初熱時自汗此濕熱重蒸毒重汗泄無壅遏矣但不可多多則陽氣暴衛氣反弱痘乃起發用調元湯甚則倍加黃芪升麻

汗不止熱反劇此邪并於陽而陽虛宜斂汗固表清熱解毒使無痒塌之患

壯熱者用當歸大黃湯

微熱者用保元湯加桂枝白芍浮麥

表素虛因發散太過而汗者宜實表用補中益氣湯調
敗毒散

膿期身涼汗不止用歸芪湯

痂痕淡白汗不止此陰陽兩虛也宜補陽救陰使無泄
氣用十全大補湯調敗蒲散外用溫粉撲法

痘後自汗盜汗榮衛皆虛心有餘熱也自汗用調元湯

黃芪湯盜汗用當歸六黃湯並調敗蒲散便秘用四順
清涼飲

治案

一痘漿足盜汗此陰虛也用保元湯加浮麥而愈

一痘後盜汗肌膚煩躁此陽虛也用補中益氣湯加麥

冬而愈

調元湯

人參 黃芪 白朮 白芍 甘草 麥冬 黃芩 汗

不止加地骨皮麻黃敗蒲扇燒灰每服三錢

歸芪湯

歸身 黃芪 棗仁

十全大補湯

人參 黃芪 茯苓 白朮 當歸 生地 川芎

白芍 桂心 甘草

溫撲法

粳米粉 黃連 牡蠣粉 貝母為末敷之

黃芪湯

炙黃芪 人參 甘草 黃連 桔梗

當歸湯

當歸 黃芪 生地 麥冬 甘草 黃連 白芍

浮麥 雄猪心

芍藥甘草湯

白芍 甘草

止汗效方

白朮 牡蠣 黃芪 葵藿將白朮分三處各炒為末

失血門

失血與汗症同為熱論但熱在胃則汗出熱在榮則血
出血能化毒而為熱火所迫遂致妄行陽絡傷則血從
上焦出衄咯嘔吐是也陰絡傷則血從下焦出小便大
便是也陰陽俱傷則上下俱出諸失血俱為惡候惟鼻
衄可治然不止亦因血載毒行傳注腎脉斬關而出
不犯其內故可治與傷寒太陽經症鼻衄為欲解全論

也

心脾火旺唇口燥裂舌胎黑白火上冲肺衄血不止初發時不可峻用寒涼以冰其毒宜用元參解毒湯元參地黃湯清肺飲犀角地黃湯髮灰散

痘後衄血餘毒入脾不能統血也宜參用前諸方加人參茯苓山梔黃連

痘即衄血用涼血地黃湯加黃芩麝金便製香附茅根汁吐血者血出於胃也用涼血地黃湯加山梔茶花炒

黑蒲黃黃芩黃連前胡一云加知母石膏便製香附

溺血用前方加木通滑石

便血用前方加秦艽槐子荊芥血不止加蒲黃藕節側
栢葉

風寒搏激脾血不運用四物湯加黑姜若痘根窠黯淡
肌青不起發者乃脾氣脫盡也

便血而血少於大腸昏睡不省此毒重而神迷也用犀
角地黃湯抱龍丸小柴胡湯加生地桃仁涼血地黃湯

加秦艽小便浸槐子炒黑荆芥

便秘用四順清涼散

鑿後便血先見過於攻發也用犀角地黄湯合四苓散
便血去多宜領歸經用犀角地黄湯加官桂黑薑

小便出血血出於小腸也用八正散涼血地黄湯加木
通滑石

尿血亦腎火太旺也初標時用山梔黃芩黃連木通蓋
心移熱於小腸滲於膀胱

溺血如屋漏水豆汁蘇木汁痛者可治不痛者難治用
生地車前散此方如吐血衄血加炒黃連便血加川芎
以仁痛加滑石山梔

腎經腫脹而紅者用八正散黃連解毒湯加地骨皮鼠
粘湯然惟生地車前散之效最速

小便逆實溺不出而痛及瀉下膿血如死肝者死胃爛
故也必欲治之用黃連當歸白芍枳殼山查甘草牛蒡
連翹大黃

血從痘中流迸而出名陽瘡出血血分空虛毒無定位
有犯於內七竅流血皆猝死之症宜於諸失血方中加
炒黑蒲黃側柏葉藕節

治案

一痘發熱時衄血宜發之用升麻葛根湯加荊芥防風
而愈

一痘四朝吐血痘陷淡白煩躁詬妄肢冷身涼此本血
熱毒壅未盡而用涼藥冰伏之故令血脫毒解而虛矣

宜先益氣用保元湯加生薑附子川芎當歸芍藥蟬退
粘米而愈

一痘正起發而便血倦怠少食作渴肢冷皆脾症也用
四君子湯加升麻橘紅炮薑而愈

一痘八日根窠赤腫煩渴飲冷便下黑血此熱毒內蘊
也用犀角地黄湯而愈

一收痂便下紫血此脾弱而熱傷陰絡也用歸芍六君
子湯加炒黑荊芥又獨參湯而愈

一收痂身熱咳嗽血痰聲啞鼻衄此火刑肺金用黃連解毒湯加麥冬知母牛蒡而愈

一痂後咳血不已此毒鬱於肺經用清金解毒而愈

一痂後便下紫血此毒鬱滯下用鬱金牛蒡燈心而愈

一痘後溏泄糞後下血此脾弱也用小異攻散加升麻地榆黃連小柴胡湯而愈

一痘後血淋乃熱結下焦也用山梔黃栢木通生地小

薊藕節當歸滑石淡竹葉甘梢

一女六歲標點吐紫黑血甚多然而唇口滋潤形色俱順神寧氣壯竟無恙因女之父素有血症遺稟非毒故不解毒不補脾而收功前症雖險而痘與神自順未可以見點吐紫血而遂為死症也

元參解毒湯

元參 黃芩 山梔 生地 甘草 桔梗 乾葛

荊芥 茅根汁

元參地黃湯

元參 地黃 丹皮 山梔 甘草 升麻 白芍

蒲黃

清肺飲

花粉 麥冬 天冬 甘草 桔梗 當歸 白苓

黃芩 丹皮 知母 調髮灰服

犀角地黃湯

犀角 白芍 生地 丹皮

髮灰散

頭髮煨研童便酒下

涼血地黃湯

黃連 歸尾 生地 山梔 元參 甘草

生地車前散

木通 犀角 升麻 白芍 黃芪 紫草 地榆

生地 車前 甘草

倒靨血不止方

胭脂 血竭 各燒存性點上即止

振破出血方

荊芥 防風 黃芪 白芷 白芍煎服

手足門

四肢者諸陽之末如應出不出應發不發應收不收此脾胃氣虛不能旁達也

手足痛初起者凶八九日者不妨

手心痛用一芍散

手足搖者不治痘勢太重手足冷者不治痘未成膿手

足脫皮者不治

發熱期內

手尋衣領亂搯物者肝熱也手摸眉目口鼻者肺熱也
手足搦搗者心肝風火相搏也各隨其症而瀉之

足冷者常候也腎主足受毒邪故也四肢為脾胃之本
宜溫而反冷者蓋四肢稟氣於胃不得至經必至於脾
乃得稟也脾弱不能為胃行其津液故冷耳宜溫之

起脹期內

手足多水泡者木剋土也宜亟治防作瀉變痒塌

見點後脚跟水冷者不妨此氣未下行也

遍身痘發手足未透而空殼者脾胃衰弱榮衛凝滯故
毒鬱而不發也能食必發瘡疽不能食者死

灌膿期內

手屬心肺足屬肝脾腎氣血弱膿不足須用羌活以引
之亦不宜多服

股內側有血海穴屬腎經獨此無膿者乃歸腎死症也

用八物湯以補氣血

收痼期內

足為純陰無陽相濟所以收遲

痘始成漿他處未收手足心先靨者其後必生怪疾

先出先收起遲收遲

手足雖不嫌多但要如期起發若頭面未見標而手足先出他處未起而手足先起他處未收而手足先收者宜早解毒兼抑陽扶陰之劑此因陽火太旺故也用四

物湯合黃連解毒湯

他處俱起俱收而手足獨起遲收遲者此脾胃弱血氣不能達也宜補之用十全大補湯桂枝芍藥湯手足現而後隱起而後塌者惡候也

攣蹇

痘初發時手足忽拘攣者毒火薰灼也任其舞蹈不可緊抱使其不得屈伸轉運也用升麻湯加味解毒湯五六朝忽然手足牽緊縮做一團者非驚也乃陽明毒

熾筋無血養耳用羚羊散

痘後手足忽然拘攣者痘多血少不能養筋或感冒風寒暑濕之氣宜補血用當歸生血散

若已成病手足不能舉動者用桑寄生湯

筆罄

毒發不盡乃於手曲池足三里或肩臑肘膝關節之處
癰腫毒發釀成痛疾直而不能屈狀如筆者其病在骨
曲而不能伸如罄之折者其病在筋非針灸藥石所能

愈惟陳氏五花湯足以軟筋為妙故痘後手足關節腫痛必發癰也宜預防之

治案

一痘後溏泄腿痛此足三陰虛也用四君子湯加陳皮當歸白芍枸杞澤瀉石斛牛膝再以八味丸而愈

一痘後脛膝結核成鶴膝風此足三陰虛邪襲之也用驅風散兼八味丸加苡仁牛膝兔絲子當歸而愈

一痘足底出起從上至頭面回至心窠內攻而死此症

當俟其頭面出齊重用保元湯加川芎升提之藥及先
護心黃連解毒湯一帖使其起灌收痂自上而下則無
危矣

羚羊角散

羚羊角 木通 紫草 地黃 白芍 殭蠶 全蝎

桔梗 荊芥 橘紅 甘草



仁端錄卷十二